




Picard, 1925.

DEPOSITED
IN
HARVARD COLLEGE
LIBRARY





QVE
LA VOIX
DV PEUPLE
EST LA VOIX
DE DIEV.

CONTRE LE SENTIMENT
*de celuy qui nous a proposé une Question
toute contraire.*



A PARIS.

Chez PIERRE VARIQVET, rue S. Iean de Latran,
deuant le College Royal.

M. DC. XLIX.

Case

F

39

326

1649g

THE NEWBERRY
LIBRARY



QVE LA VOIX DV PEUPLE est la voix de Dieu.

*Contre le sentiment de celuy qui nous a
proposé une Question toute contraire.*



O v s deuons corriger ceux qui resistent
à la verité, avec quelque espece de mo- ^{2. Tim. 2.}
destie, ainsi que saint Paul nous l'en- ^{25.}
seigne, en sa deuxiesme Epistre, escri-
uant à Timothée Euesque d'Ephese; ^{Mich. 7. 5.}
Veu qu'il ne leur est pas permis de blasphemer contre
cette fille du Ciel, en faueur de qui que ce puisse
estre. Cheminer sur les pas de cette illustre perma-
nente, dit le Prophete Samuel, c'est aimer Dieu de
tout son cœur, & de toute son ame, & son prochain ^{1. Roys, 2. 3.}
comme soy mesme, par vne consequence de necessi-
té bien tirée. Saint Pierre veut que l'on se prenne ^{2. Pierre,}
bien garde de ceux qui corrompent l'intelligence de ^{3. 17.}
l'Ecriture, & qui la tournent à leur sens, pour en fai-
re comme bon leur semble.

Moyse le plus excellent & le plus parfait de tous
les Clair-voyans qui furent iamais, ny en la Loy Na- ^{Deut. 4. 2.}
turelle, ny en la Loy escrite, nous defend d'adiouster
ny diminuer chose quelconque à la parole eternelle:
parce qu'elle est fondée sur des decrets irreuocables,
au sens du Prophete Royal Dauid: & parce qu'elle ^{Psal. 6. 11.}
sera tres-horrible à tous ceux qui n'y croiront pas, se- ^{Hebr. 4. 12.}
lon l'esprit du Docteur des Gentils, ou pour mieux
dire, selon l'Oracle de la Verité incomprehensible.

4

C'est pourquoy ceux qui disent, que la voix du Peuple, n'est pas la voix de Dieu, deuroient bien examiner la forme de leur proposition : car la faisant problematique, & vniuerselle, elle ne scauroit estre absolument veritable, ny en son sens, ny en sa quantité; attendu qu'il n'y a point de Regle de cette nature si generale qui n'ait son exception, en quelque sorte qu'on le veuille prendre.

Esa. 9. 17.

Si ie disois avec Esaye, tout homme est menteur, & puis que ie continuasse de moy-mesme à dire, IESVS-CHRIST est homme, donc IESVS-CHRIST est menteur. Outre le blaspheme que ie ferois, ie serois plus menteur, & plus abominable que tous les Diables ensemble; parce que, selon saint Paul, escriuant à Tite & aux Hebreux, Dieu ne scauroit mentir en façon quelconque.

Tit. 1. 2.

Heb. 6. 18.

Si l'iniure que l'on feroit à Dieu en parlant avec vne impieté si grande estoit au Syllogisme suiuant, il me semble, que ce seroit vne mesme chose.

La voix des Creatures raisonnables ne fut iamais la voix de Dieu, la voix des Peuples est la voix des creatures raisonnables, donc la voix des Peuples ne fut iamais la voix de Dieu.

Quand la proposition est à double sens, il faut de necessité qu'il y ait quelque diffinition à faire. Et sans me seruir de l'autorité, qui est toute formelle, pour mon sujet, en Daniel, & que vous adoucissez vn peu pour l'accommoder au dessein que vous auez de faire voir, que la voix du Peuple, n'est pas la voix de Dieu; ie ne laisseray pas pourtant de vous monstrier, si vous me faites l'honneur de m'escouter sans passion, que la voix du Peuple, n'est pas seulement quelquefois la voix de Dieu : mais que la voix des estres moins nobles, l'est pareillement aussi en quelque sorte.

Escoutons de grace cet incomparable Pere de l'Eglise

5
 glise, saint Augustin, lors qu'il dit en ses Confessions, Ch. 6.
 qu'après avoir conjuré le Ciel, le Soleil, la Lune, les
 Etoiles, l'Air, la Terre, la Mer, les Abysses, & tous
 les objets qui estoient à l'entour de luy, de luy dire,
 s'ils estoient son Dieu, & s'ils ne luy auoient pas don-
 né l'estre; qu'à mesme instant toutes ces choses en-
 semble luy respondirent d'une voix merueilleuse-
 ment éclatante, que non, & qu'elles n'estoient que
 l'ouvrage de celuy qui auoit créé cette machine si ri-
 che, si spacieuse, & si admirable.

Les Cieux, dit David, racontent la gloire du Sei-
 gneur; & ces cercles tousiours roulans, publient in-
 cessamment qu'ils ont esté faits de la main de ce Sou-
 uerain incomprehensible. Psal. 18.

Voyez, ie vous supplie, apres cela, si la voix de ces
 estres naturellement muets, n'est pas la voix de Dieu,
 & si elle ne peut pas estre aussi en des occasions d'une
 pareille necessité, celle du Peuple.

Il y a un nombre infiny de Nations qui ont presché,
 & qui preschent encore tous les iours IESVS-CHRIST,
 & la voix de ces Oracles d'une si eternelle verité, ne
 seroit pas celle de ce diuin Reparateur qu'ils annon-
 cent? Cela n'est pas croyable; Dieu exauce le cry des
 pauvres qui l'inuoquent en leurs tribulations, & aus-
 quels on fait violence. Les Israélites demandent à
 Dieu qu'il les deliure de la tyrannie où ils sont, &
 Dieu donne sa voix à la supplication qu'ils luy ont
 faite. Ils demandent quelqu'un pour leur annoncer
 la parole de verité, & IESVS-CHRIST leur est
 donné pour Prophete. Je vous conjure au nom de
 Dieu, de vous desabuser d'un sentiment si vniuersel,
 que celuy que vous avez, & où vous ne faites point
 d'exception aucune.

Ce Souuerain Seigneur consent à tout ce que nous
 luy demandons, selon la volonté de son Fils, moyen-
 nant que nostre cœur ne nous reprenne point, & que

Marc. 17. nostre supplication soit legitime. Quand vous ferez
 24.
 Mat. 18. 16. deux ou trois fideles assemblez en mon nom, vous
 Ioan. 14. 13. n'aurez qu'à m'implorer d'un grand cœur, pour auoir
 tout ce qui vous sera necessaire.

Les Israélites luy demandent la terre de Chanaan;
 Ios. 21. 44. & à mesme temps elle leur est octroyée. Les Israélites
 luy demandent vn Roy, & à mesme temps il leur of-
 fre Saül, & au mesme temps, il commande au Pro-
 phete Samüel de leur oindre. Les Israélites le prient
 Sam. 8. 34. de les deliurer, de la guerre & de la famine qui les ac-
 2. Rois, 7. 7. cabloit, & à mesme instant, ils en sont deliurez sans
 aucune assistance humaine. Tous les peuples de l'V-
 niuers luy demandent le salut eternel, & à mesme in-
 Luc. 2. 31. stant il leur enuoye son Fils pour obtenir de luy cette
 grace.

Mais sans aller chercher des exemples si loin, la
 voix du Peuple, n'est-ce pas la voix de Dieu, quand
 elle dit, que le Roy dernier mort estoit le plus iuste
 Monarque de l'Vniuers, & que le Roy son Fils nous
 a esté donné de Dieu pour tenir sa place. Si la voix de
 ce Tout-puissant ne s'accorde pas avec la nostre en ce-
 la, ie ne croy pas qu'elle s'y accorde iamais en quoy
 que ce puisse estre.

La voix du Peuple, n'est-ce pas encore la voix de
 Dieu, puis qu'elle desire de voir nostre bon Roy à
 Paris, avec des passions qui n'en eurent iamais de pa-
 reilles. Je ne veux pas soustenir pour cela, que la Voix
 du Peuple soit tousiours la Voix de Dieu, & que ce
 monstre a plusieurs testes, sans iugement & sans con-
 duite, ne s'attache quelquefois à desirer des choses
 que Dieu luy defend, & que sa Iustice aura soin de
 punir, avec vne extreme seuerité, dans la durée des
 flammes eternelles. A Dieu ne plaise; ce seroit passer
 d'une extremité à l'autre. Je sçay bien que quand le
 Peuple mesprisoit Dieu, & que quand les Israélites
 Ierem. 6. 12.
 Iug. 6. 1. adoroient les Idoles, que dans des actions de pareille

nature, la Voix du Peuple ne pouuoit pas estre la Voix de Dieu; veu que leurs effects estoient contraires aux Loix qu'il leur auoit prescrites: mais il faut necessairement croire aussi, que quand ces gens-là s'humilioient à vouloir ce que Dieu pouuoit desirer de leur personne, qu'alors la Diuine Majesté, par vn effect de son amour & de sa grace, ne faisoit pas difficulté de se porter librement à consentir à leurs souhaits, pourueu qu'ils fussent equitables, & de donner ses sentimens à des passions, d'une condition tres-soumise.

Non, il n'est pas croyable, que Dieu ait iamais donné sa Voix à des iniustes supplications, ny à des affections qui ne tendoient qu'à ruiner le bien & l'honneur de ses viuâtes images. Il ne veut pas seulement qu'on songe mal des Roys en aucune façon, ny qu'on parle mal du Prince. Ne perseuere pas, dit-il, Eccl. 10. 20. Exod. 22. 28. Eccles. 8. 4. en choses mauuaises, car il fera tout ce qu'il luy plaira, sans que personne puisse trouuer à redire. Et dans Samuel, ce souuerain Seigneur ne dit-il pas encore, Sam. 8. 10. que le Roy prendra nos biens & nos enfans, & qu'il disposera de nous, comme si nous estions des esclaves. Cela nous fait bien voir avec quelle reuerence nous deuons parler de leur sacrée personne.

En vn mot, quand le Peuple veut bien faire, Dieu ne manque pas de l'assister de ses conseils, & de l'inspirer de ses graces, comme il fait en ce rencontre; & nous pouuons dire maintenant, que la Voix du Peuple est la Voix de Dieu, puis qu'elle ne se forme que d'une confusion de voix, qui demandent à son infinie Bonté, le retour du Roy & de la Reyne Regente dans Paris, avec autant de zele, que si nous luy demandions la beatitude eternelle.

Il est tres-certain, M A D A M E, que la passion que tout le Monde de Paris a pour vos Majestez est incroyable. La Voix du Peuple, ne scauroit estre en ce rencontre

que la Voix de Dieu, & si vous ne consentez pas à la grace que l'on vous demande, vous allez directement contre la volonté de celuy à qui vous devez toutes choses. Cōsultez-le, ie vous en supplie, puis que vous avez fait vœu de l'imiter, & si vous voulez faire comme luy, vous ferez gloire de pardonner à tous vos Sujets, à cause de bien peu de iustes.

Gen. 18. 24.

Ezec. 33. 17.

Dent 30. 3.

1. Rois 8.

31.

La Clemence est vne habitude de la volonté, par laquelle les Souuerains remettent facilement le tort qu'il leur est fait, & par laquelle ils font voir qu'ils ont quelques traits de Diuinité, qui ne se trouuent pas au reste des hommes. Dieu n'a ny feux ny foudres pour les repentans, & sa miséricorde fait soufmettre ce diuin Seigneur aux volontez de celuy qui l'aluy demande. Si Dieu oublie tous les crimes que nous auons fait contre luy, pour l'amour de son Fils, que ne devez-vous pas faire pour nous en faueur de cet Oinct sacré, que vous chérissiez avec tant de tendresses? Oüy, MADAME, le pardon seul destruit la coulpe, & la seule grace nous affranchit de toutes sortes de crimes.

De quelle offense est-ce que toute la Nature humaine ne s'estoit pas renduë criminelle enuers Dieu, depuis la cheute d'Adam, iusques à la venuë du Sauueur de nos ames? Les Idolatres & les Sodomites estoient si communs, que la terre en estoit toute couuerte. Et qu'est-ce que ce bon Seigneur fist pour se vanger d'un Peuple qui l'auoit abandonné, & qui ne le vouloit plus reconnoistre en façon quelconque. Il leur enuoya son Fils pour leur donner le salut eternal, & pour les instruire par mesme moyen à s'éleuer au suprême degré de la grace & de la gloire. Voilà vn chastiment bien amoureux, ce me semble, & digne d'un Dieu si clement, en faueur de tant de creatures si abominables.

Nostre coulpe, quoy que bien grande, ne sçauoit estre

estre si extreme que celle de ces premiers Peres, en façon quelconque. La leur estoit infinie, parce qu'elle s'adressoit à la mesme infinité, & par consequent la punition en deuoit estre eternelle. Et celle dont on nous accuse, ne se scauroit estendre, au pis aller que sur la vie temporelle.

Mais, au nom de Dieu, MADAME, que cette grande & extraordinaire pieté que vous avez enuers ce diuin Sauueur de nos ames, vous oblige à l'imiter en toutes choses. Redonnez-nous vostre cher Fils, avec vne pareille amour, que ce diuin Seigneur nous donne le sien, pour nous chastier, comme il chastia nos anciens peres, ses seruiteurs, d'autant ou plus dangereux pecheurs que nous ne sommes pas, & que nous ne scaurions estre; & vous remettrez toute cette Monarchie, dans vne splendeur, qui n'en eut iamais de pareille. C'est vne tres-humble supplication que toute la France vous fait, & que vous luy deuez octroyer; puis que c'est au nom du Roy des Roys qu'elle vous le demande.

Vostre Majesté scaura, s'il luy plaist, MADAME, que c'est vn present que le Ciel nous a fait, par vostre entremise. Les Roys sont plus à leurs sujets, qu'à ceux, qui les ont mis au nombre des estres. Comme fils, il vous a esté donné de Dieu: mais comme Souuerain il a esté destiné pour son Peuple. Comme Roy, c'est vn thresor qui nous appartient: mais comme issu de vos flancs, il vous doit absolument obeir, iusques à ce qu'il soit en estat de prendre le soin de nos affaires. Et vous deuez scauoir, MADAME, qu'il n'est pas moins l'ame de l'Estat, que l'obiet de toutes vos pensées, & que le siege de l'ame ne peut estre que le cœur, selon les sentimens des plus experts en la connoissance de ces matieres. Si cela est, comme il n'en faut pas douter (attendu que c'est le premier viuant, & le dernier mourant:) le siege du Royn ne scauroit

estre qu'à Paris ; puis que c'est le cœur de toute cette Monarchie Françoisse.

Après cela, vostre Majesté ne scauroit faire que pervertir l'ordre de la Nature, & que s'opposer à la Voix de Dieu, si elle ne nous redonne pas vn Souuerain que Dieu mesme nous a delia donné par vostre moyen, & si elle ne remet pas les choses en l'estat qu'elles doivent estre. Vous avez bien fait cesser les troubles de cet Empire ; mais vous n'avez pas encore calmé les passions de nostre ame. Vous nous avez bien appris nostre deuoir ; mais vous ne nous avez pas encore donné tout le bien que nous esperions d'une si belle science.

Vostre Majesté s'estant chargée de la conduite de ce grand Estat, en doit cherir tous les sujets, comme membres du Souuerain, que vous estimez plus que vous-mesmes : Et puis qu'il fait luy seul tout vostre bien, celuy qui luy appartient, vous doit estre aussi en quelque façon considerable. Ses interets doivent produire tous vos desirs : mais l'amour de Dieu doit estre l'obiet de toutes vos inclinations, & de toutes ses esperances. Traitez donc de grace vos Sujets, de la mesme sorte que ce Souuerain Seigneur traite ses creatures ; puis que c'est le vray exemple de la vie Chrestienne. Meslez la Clemence avec la Piété en faueur de vos pauvres sujets, & vous ferez vne action qui comblera tout l'Estat, d'une felicité permanente.

Dieu s'accommode bien aux inclinations des hommes, & sa diuine Majesté ne traite jamais avec eux, que ce ne soit tousiours avec plus de douceur, que de force. Il vse de temperance avec les fougoux & les violens : Il fait le clement avec ceux qui l'offencent tous les iours : Il s'humilie pour nous exalter : Il se conuertit tout en misericorde, pour suruenir à nos besoins : & il donne ses biens & son amour, à ceux-

mesmes qui se rendent continuellement indignes de ses graces. Ainsi par vne bonté qui ne doit iamais auoir d'autre modelle, que celle de ce diuin Sauueur de nos ames. vostre Majesté doit tendre la main à nos necessitez, & nous enrichir encore vne fois de nos propres dépouilles.

Vos deuanciers ont manqué quelquesfois en leur conduite; parce que leur gouvernement estoit plein d'erreur & de violence: Mais le vostre, prenant celuy de Dieu pour exemple, ne doit pas auoir aucun de tous ses defauts, & vous deuez accorder le bien de l'Estat aux tres-humbles supplications de ses Peuples: & bien que l'art de gouverner des Nations soit vn des plus grands efforts de tous les plus experts en la Politique, Vostre Majesté n'aura pas beaucoup de peine à nous conduire; puis que nous auons desia fait vœu à Dieu, de nous soumettre à toutes vos volontez, & de demeurer dans vne parfaite obeissance.

Si vous nous auez fait voir qu'il n'y auoit point de crime que vous ne sceussiez punir, montrez nous à present aussi qu'il n'y a point, ny d'amour, ny de soumission, que vous ne sçachiez reconnoistre: & si IESVS-CHRIST vous commande d'auoir de la douceur pour vostre prochain, à plus forte raison vous commande-t'il d'en auoir encore plus pour des Sujets, qui font vne partie de vous-mesme.

Sainct Iacques nous apprend, que l'ire de l'homme est ennemy mortel de la Iustice de Dieu, sans aucune reserve. C'est ce qui fait que les Princes qui regardent les Peuples d'un œil de pitié, sont mille fois plus chers, que ceux qui ne font que les regarder d'un œil de colere. Cette passion qui fait quelquefois tant de desordre dans l'esprit des plus iudicieux, est vn mouuement enflammé, qui ne conuient pas bien ny à la Maiesté des Roys, ny mesme à la grandeur des Princes.

L'iniure des Sujets est d'une nature trop rampante & trop terrestre, pour auoir la faculté de s'esleuer d'elle-mesme, iusques à la dignité du Souuerain. Il y a trop loin de la personne sacrée, à la personne profane, & le peuple a beau murmurer contre ces mortelles Deitez, ils n'y feront non plus que s'ils ne faisoient qu'aboyer contre la Lune. L'iniure est trop funeste à ceux qui prestent l'oreille à de si abominables suscitacions que les siennes. Elle allume le sang, elle impose silence à la raison, elle reduit en cendre les Estats les mieux policez, & finalement elle porte les plus sages à s'oublier & à se mesconnoistre.

La vangeance est vne furie infernale, qui ne se repaist que du sang humain, & qui ne trouue nulle satisfaction, que parmy les incendies & les sacrileges.

Luc. 9. 55. Ceux qui sont conduits de l'Esprit de IESVS-CHRIST, la fuyent comme la mort, ou pour mieux dire, comme la peste. Ce diuin Seigneur ne se voulut pas vanger des Samaritains qui l'auoient reieté, Luc. 9. 54. pour apprendre à tous les Chrestiens, à ne se laisser 1. Thef. 4. 6. jamais vaincre à cet esprit de vangeance. Et certes il Rom. 12. 19. vaut bien mieux la laisser faire à Dieu, que prendre Deut. 32. 53. la liberté de se la faire soy-mesme.

C'est vn priuilege special qui luy a esté tousiours reserué, depuis le commencement des siecles. Il n'y a point de Prince qui ne se doie seruir de la Manfuetude, pour empescher que dans la violence de son ardeur, il ne se porte à des excez grandement reprochables. La pieté avec laquelle vostre Majesté se fait admirer de Dieu & des hommes, doit estre suiue de la Clemence & de la Misericorde, si vous voulez qu'elle continuë à faire des miracles sans exemple. Le Prince des Sages dit, qu'elle rend les Roys bien heureux, par dessus le reste des hommes. La Clemence n'en fait pas moins, comme nous auons desia dit, & la Misericorde les rend semblables à celuy qui leur a donné

donné l'estre. La haine au contraire, elle seule destruit toutes les Vertus ensemble. C'est ce qui a fait dire à saint Jean, que celui qui haïssoit son frere, 1 Ioan. 2. 7 estoit homicide, & qu'il ne pouuoit pas estre aucunement dans la lumiere de l'Euangile.

Dieu ne vous a pas créée, MADAME, que pour vous faire part de sa bonté, & que pour vous donner sa grace & sa gloire. Vostre Majesté possède l'une; mais au nom de ce Souuerain Seigneur de l'Vniuers, qu'elle prenne le soin de s'élever au plus supreme degré de l'autre.

Il vous a donné vn entendement pour penetrer dans les mysteres de l'aduenir, & pour vous donner vne parfaite connoissance de ce que vous auriez à faire. Il vous a dotée d'une excellente memoire, pour vous souuenir des commandemens qu'il vous a faits. Il vous a donné la volonté, pour vous porter franchement & de vous-mesme à suivre ses loix: & il vous a donné l'imagination, pour vous figurer le traitement qu'il fait à ceux qui n'usent pas bien de ses graces.

Ouy, MADAME, vous pouuez librement accuser d'infidelité les facultez de vostre esprit, d'auoir demeuré si long temps à vous représenter des choses si necessaires à vostre salut, & si vtilles à cet Empire.

Mais il ne faut pas tellement s'exercer à rappeller ces objets passez, qu'il ne faille oublier toutes les iniures que vostre Majesté pretend auoir receues, si elle veut que LESEY-CHRIST rembrasse son party, & qu'il punisse tous les auteurs de nos desordres.

Remerciez cet admirable Sauueur, des saintes instructions qu'il vous donne, & des celestes lumieres qu'il vous communique. Considérez ce qu'il a fait pour vous iusques icy, & croyez qu'il ne manquera pas de vous combler encore plus à l'aduenir de ses biens-faits, si vous suinez les inspirations qu'il vous communique.

Certainement, M A D A M E, le Ciel est ouuert pour vous, si vous traitez vos subjets, de la mesme sorte, que Dieu traite ses creatures. Le Pere Eternel nous fait voir tous les iours son Fils dans le saint Sacrement de l'Eucharistie; & si sa diuine Bonté nous le donne pour nostre salut, nous taschons de tout nostre pouuoir à nous rendre dignes de le recevoir, & pour son honneur, & pour sa gloire.

Que vostre Majesté en fasse de mesme, M A D A M E, ie vous en coniure; & ie vous engage ma foy, que nous vous receurons également tous deux, avec le mesme amour & le mesme respect, que la dignité de vos personnes sacrées le requiert, & que Dieu mesme nous le commande.

Ne fermez pas l'oreille aux supplications que tout le Peuple vous en fait: car c'est veritablement la Voix de ce Souuerain Seigneur qui vous parle par nostre bouche. Le Prince qui se rend incredule à la parole de Dieu, sera puny de son incredulité; veu qu'il n'entrera iamais dans le repos d'une vie eternellement heureuse.

Quand le Prophete (à ce que nous apprend la Sapience infinie) vous fera entendre quelque chose au nom du Seigneur, & que sa perdition n'arriuera pas de la sorte qu'il l'aura faite, assurez vous que ce n'est qu'une pure inuention du mauuais esprit, qui ne fait que parler par sa bouche. Il faut donc necessairement inferer de là, que tous ceux qui predissent les choses qui doivent arriuer, de la mesme sorte qu'elles sont predites, ne parlent que de la part de Dieu, & que ce Souuerain Seigneur ne fait que se seruir de leur Voix, pour rendre sa sainte & sacrée volonté, plus intelligible à ses creatures.

C'est la raison pour laquelle Dieu veut que vous entendiez sa Voix, & outre cela que vous y obeissiez, sur peine d'encourir sa disgrâce.

Heb. 3. 16.

Exod. 15. 16

Deut. 30. 16

Examinez vn peu ces paroles de l'Eſcriture, M A D A M E, & voſtre Maieſté trouuera, que ce ne peut eſtre que la Voix de Dieu, quand tout le Peuple la ſupplie tres-humblement de reuenir dans ſa Capitale ville de Paris, & d'y ramener vn Souuerain que Dieu leur a donné, pour faire le ſalut de toute cette Monarchie. La Beatitude eternelle eſt ſi deſirable de foy, qu'il n'y a rien au monde, que nous ne ſoyons obligez de faire pour l'acquérir, ou du moins pour nous en rendre dignes.

Ce nombre infiny d'AnGES, de Cherubins, de Seraphins, d'Apoſtres, de Martyrs, de Confeſſeurs, de Vierges, de Saints & Saintes qu'elle a chez elle, ont de ſi excellentes conuerſations, que voſtre eternité ſeroit bien malheureuſe, ſi elle en eſtoit priuée pour vn iniuſte plaſir, contre la volonté de celuy, qui s'eſt donné luy-mesme, pour vous éleuer dans vne felicité ſi celeſte & ſi glorieuſe.

Ha, M A D A M E! que n'ay-ie vne partie des lumieres, que Saint Paul auoit en l'art de perſuader, lors qu'il preſchoit I E S U S - C H R I S T à toute la terre habitable, afin de porter voſtre cœur, plus facilement que ie ne fais pas, à nous faire quelque eſpece de miſericorde.

Dieu vous commande d'examiner quel eſt voſtre ſentiment, ſur la requeſte que tout Paris vous en fait par ma bouche: car en la reſolution que vous prendrez, conſiſte le fondement de voſtre vie ſpirituelle. Et ſi vous auez quelque degouſt pour noſtre repos, eſtudiez-vous à ſçauoir d'où il peut venir, & à iuger quelle en peut eſtre la cauſe, afin d'y remedier le plus promptement qu'il vous ſera poſſible.

Oüy, M A D A M E, voſtre eſprit eſt obligé à vous rendre conte de l'eſtat où il ſe trouue, & enuers Dieu & enuers ſes peuples; puis qu'il y va de l'eternité de l'un & de l'autre.

Quand la pensée de ce digne Souuerain de nos ames vous arriue, parmy les grandes affaires que vostre Regence vous donne, ne se fait il pas faire place dans ces prodigieux empressements terrestres? Et ne vous semble-t'il pas que vostre cœur se tourne du costé que cette adorable pensée vous vient, pour aller au deuant d'une grace si diuine & si celeste? Vous plaisez-vous à mediter sur ce que I E S V S - C H R I S T a fait pour vous, afin que vous en fassiez autant pour luy en faueur de ses creatures? C'est vn Seigneur qui vous demande le reciproque de toutes les graces qu'il vous a communiquées: & en reuanche il vous promet de vous en rendre cent fois autant icy bas parmy nous, & là haut en la vie eternelle, si pour obeir à l'Euangile, vostre Majesté fait quelque chose en faueur de ceux qui implorent vostre assistance.

Mat. 19. 29.

Mar. 10. 29

Luc. 18. 29

Auez-vous autrefois laissé quelque mauuaise inclination pour Dieu? Si cela est, comme il n'en faut pas douter, vostre Majesté fera bien encore ce que nous luy demandons, au nom de ce Souuerain Monarque?

Ce que ce diuin Sauueur de nos ames a souffert en ce monde, & particulièrement au iardin des Oliues, & sur le Mōt de Caluaire, vous suscite à luy faire quelque reconnoissance à l'endroit de ces Peuples.

Pardonnez, M A D A M E, à ce desir déreglé que nous auons de reuoir vos Majestez: Car il est vray que nostre esprit, parmy la paix qu'il vous a pleu nous donner, ne scauroit estre iamais bien satisfait, si vous ne nous accordez pas encore vne chose qui ne dépend que de vous, & qui nous est si precieuse.

L'amour que nous auons pour nostre Prince, nous attache si fort à cet objet tant aimé, qu'il est tout à fait impossible de nous tenir plus long-temps separez, sans nous faire mourir du plus cruel supplice,

ce, que la tyrannie puisse inuenter parmy les hommes.

Nostre ame est tellement preoccupée du desir de reuoir ce Dieu donné, qu'elle est comme morte en toutes ses autres facultez, quelques raisonnables qu'elles puissent estre.

Nos yeux sont ouuerts, mais ce n'est que pour reuoir vos Majestez. Nostre bouche parle, mais ce n'est que de vostre retour: & nostre fantaisie blessée, ne fait que se diuertir à l'aspect des images de cette premiere entreuë, comme si la chose estoit: & puis reuenant à soy, on n'entend retentir dans l'air, qu'une confusion d'he las, quand sera ce que Dieu nous fera cette grace!

Le zele que nous auons pour cela, est vn feu du Ciel qui nous a consummez, iusques à ne nous laisser qu'un peu de voix, pour vous dire que c'est de la part de Dieu & des hommes, qu'on vous fait des supplications si iustes & si pressantes.

Le Prophete Royal Dauid dit, que le zele qu'il auoit conçu de la maison de Dieu, luy auoit consummé le cœur, & deuoré les entrailles. Nous en pouuons bien dire de mesmes du desir que nous auons de reuoir vos Majestez, ou dans vostre Palais Royal, ou dans vostre Louure: & ne croyez pas, MADAME, que nos esprits soient appaisez iusques à ce que tout le Peuple de Paris se trouue honoré de vostre presence.

Oüy, MADAME, nous souhaitons avec passion, de voir ce visage, qui s'est autrefois obscurcy pour nous dans vne serenité merueilleuse.

Oüy, MADAME, nous desirons avec vn amour incroyable de voir ce corps qui s'estoit armé contre nous, pour le combler de benedictions extraordinaires. Il faut que vostre Maïesté sçache, MADAME, que nous ne tiendrons jamais la paix qu'elle nous a

donnée pour inuiolable, si elle ne nous fait la grace de reuenir à Paris, & si elle ne rend nostre Dieu donné à la Voix de Dieu & du Peuple.

Le Ciel, la terre, l'Estat, l'interest du Prince, l'amour de la Patrie, tous vos Subiets, la necessité des affaires, enfin mille sortes de raisons diuines & humaines, vous coniuient au nom de celuy qui peut tout, de nous faire cette grace.

La Paix se plaint, de ce que vostre Maiesté ne se donne pas la peine de venir icy pour la faire reconnoistre à vos peuples. Et ie ne croy pas qu'à la fin on ne la traite comme vne esclauue, si vous ne prenez le soin de la venir assister de vos graces. Vostre presence ne luy est pas moins necessaire que nostre amour; & c'est la produire ignominieusement, que de l'envoyer comme vn obiet de mespris, ou comme vne miserable indifferente.

Pardonnez-moy, MADAME, si ie vous dis que sa condition ne luy permet pas d'estre considerée de la sorte. Ses qualitez vous peuuent instruire de l'origine de sa Noblesse.

Si vous prenez le soin de tourner les yeux sur cette adorable, vous trouuerez qu'elle est l'obiet de toutes les felicités, l'image mystérieuse de l'estat Angelique, la Beatitude eternelle, l'amour de IESUS-CHRIST, l'idée de la Nature incréée, l'union hypostatique des trois personnes Diuines; en vn mot, vous trouuerez que c'est Dieu mesme, lequel apres auoir humilié sa sainte & sacrée personne, à se releuer de nostre Nature, voulut mourir en Croix pour le salut des hommes, afin d'establir vne paix infinie entre sa diuine Maiesté, & des mortels ingrats à tant de graces qu'il luy a pleu de nous faire.

Oüy, MADAME, si vous prenez le soin de tourner les yeux encore vn coup sur cette adorable, vous trouuerez qu'elle merite bien peu, si elle ne merite vostre presence.

Nous voulons voir ce Dieu-donné & cette Reyne si pieuse dans l'enceinte de nos murailles: car tant que vos Maiestez se tiendront hors de Paris, nous ne scaurions nous imaginer, que vous nous ayez donné vne paix asseurée.

On ne connoist les causes que par leurs effects, selon le Prince de la secte Peripatetique: si cela est, sur quoy nous pouuons nous asseurer de sa longue durée.

Le mesme nous apprend encore, que l'entendement de l'homme ne possede aucune connoissance que par le ministère des sens, & nous n'auons rien veu iusques icy qui nous puisse desabuser de l'apprehension où nous sommes.

Ces éloignemens premeditez, & ces fuites estudiées, nous sont d'un tres-mauuais augure. Chose quelconque ne nous scauroit empescher de viure dans vne continuelle apprehension, si vous vivez tousiours dans cette continuelle façon de faire: & vous auez beau dire, M A D A M E, la crainte est vne tache originelle, ou pour mieux dire, vne passion de l'appetit-irrasceible, par laquelle l'ame s'occupe à la meditation du mal qui nous menace: & contre lequel elle ne scauroit trouuer vn moyen pour se defendre; si vostre Maiesté ne nous fait la grace de reuenir, & de nous mettre l'esprit en repos par vne presence si desirée que la vostre.

Vous deuez imiter I E S V S - C H R I S T, si iamais personnel a deu imiter d'un grand zele, à cause de la particuliere deuotion que vous auez tousiours eue pour cet adorable Souuerain Seigneur, duquel vous auez receu tant de tresors perissables & eternels avec des profusions immenses: & à cause du commandement qu'il vous en a fait exprès, aussi bien qu'au reste de les creatures.

Vous scauez que ce veritable Isaac, ingenieux

pour nostre salut, se fait voir à qui souhaite ce bonheur, & se donne à qui le desire. Continuez donc à suivre ses exemples, si vous voulez qu'il continuë à vous communiquer ses graces. C'est vn Dieu infiniment ialoux de ses droits, que qui peche contre le Saint Esprit, dont il vous fait part, se rend coupable d'un crime, qui ne trouuera iamais de remission, ny en ce monde, ny en l'autre. Pensez combien il y a que vostre Maïesté nous traite avec des rigueurs qui n'en eurent iamais de pareilles. Considerz l'incertitude du iour où Dieu vous doit appeller deuant le Tribunal de sa Iustice. Sçachez, qu'alors le Monde finira pour vous, & que les affaires de l'Estat ne vous paroistront plus que comme des obiets importuns, ou que comme des especes odieuses. Oüy, M A D A M E, vostre Maïesté ne se peut approcher de celle de Dieu, qu'en tremblant, si vous nous priez davantage de la vostre.

Mat. 12. 31.
Ioan. 1. 16.

L'extreme passion que nous auons pour vous, nous fait parler de la sorte. C'est vn Prince que nous auons demandé à Dieu, avec des instances, qui n'en eurent iamais de pareilles. C'est le Fils de nos prieres & de nos larmes, aussi bien que celui de vos deuotions continuelles. C'est vn present qu'il a pleu à sa Diuine Bonté de nous faire, & que nous auons obtenu de luy par vne grace toute particuliere.

Le Ciel ne l'a donné que pour l'Estat, & pour le salut de la Patrie: c'est pourquoy vous ne scauriez nous retenir plus long temps, vn bien qui nous appartient si legitimement, sans nous faire beaucoup d'injustice.

Pleust à Dieu que vous eussiez le don de penetrer iusques au fond de nos cœurs, afin de voir sans aucune difficulté, avec quelle passion tout le monde de Paris le desire. Les ennemis de cet Estat, n'apprehendent rien tant que l'interinement de cette grace.

Après

Après cela, il n'y a rien au monde que vous puissiez craindre en façon quelcōque. Le Prince & le Peuple bien vnus ensemble, ferons des merueilles pour la gloire du Souuerain, & pour l'honneur de la Patrie.

L'Allemagne, lassée de seruir de theatre à tant de guerres qu'elle souffre depuis longues années, continuera de vous solliciter à faire la Paix generale, ne pouuant plus desormais fournir de subsistance à tant d'armées, qui ont tousiours vescu aux despens de cette pauvre desolée.

L'Espagne qui n'en veut point, parce qu'elle la veut autrement, qu'elle ne la vouloit pas aux traitez precedens, & parce qu'elle espere aussi de profiter beaucoup de nos desordres: dès qu'elle sçaura que le Roy est de retour dans Paris, & que toutes choses sont calmes, fera supplier vostre Maiesté de la luy donner, & de luy accorder ce qu'elle refuse.

L'Angleterre tremblera de sçauoir, que vous ferez en estat de punir son parricide.

La Suede sera bien aise, de voir que vostre Maiesté aura mis les affaires aux termes de la secourir, lorsqu'elle aura besoin de vostre assistance.

La Pologne fera des feux de ioye, d'une conduite si genereuse que la vostre.

La Flandre, maintenant toute orgueilleuse, s'humiliera, apres vne si celeste action, à receuoir les loix que vous aurez soin de luy prescrire.

La Catalogne, ne pouuant perdre la memoire des outrages qu'elle a receus de Madrid, redoublera le zele qu'elle a pour les François, & par vne reconnaissance ordinaire aux grands courages, elle s'affermira encore plus en la fidelité qu'elle vous a iurée.

Naples vous demandera vn Libérateur.

Sicile, Sardagne, & Corse, tourneront les yeux sur vostre prudence & sur vostre conduite.

Malthe vous considerera comme vne des plus

Illustres Princesses de la terre.

Rome chancellante, songera à ne rien entreprendre qui ne soit tres equitable.

Milan fera dans des appréhensions incroyables, d'un coup d'Etat si considerable.

La Sauoye se mettra d'abord en campagne pour vostre service.

Venise en fera rauie, sous espoir de tirer de vous quelque petite assistance.

Genes ne viura plus dans l'indifference.

La Toscane renouellera sa neutralité.

Enfin toute l'Europe n'attend vostre retour dans Paris, qu'avec des passions inconceuable.

Jugez apres cela, MADAME, si cette action scauroit estre vtile à tant de Nations, & si elle peut estre desirée, comme elle est, de tous ceux qui habitent la plus noble partie de l'Vniuers, sans que la Voix du Peuple, soit la Voix de Dieu, & sans que la Voix de Dieu, soit la Voix du Peuple.

Ha, France, que tu seras heureuse au retour de ce petit Isaac, avec lequel ton Sauueur a fait vne si estroite alliance!

Ha, France, que tu recevras de satisfaction en la premiere entre-veuë d'un Prince, qui ne respire l'air que pour te rendre bien-heureuse!

Ha, que ce nouveau retour va redonner la vie à des cœurs tres-languissans, & la mort à des desirs outrageux & superbes!

Combien de captifs deliurez en vn moment? & combien d'exilez restablis & dans leurs biens & dans leurs charges? Combien d'insolens abbatus? & combien de tempestes calmées?

Mais au cotraire, MADAME, vous nous traitez comme si nous estions les plus criminels de la terre. Vous nous retenez ce que Dieu nous a si liberalement donné, & vous nous separez de tout ce que nous desi-

rons le plus au monde. Vostre esloignement nous fait souffrir des tourmens incroyables. Les iours nous semblent des nuicts, & les nuicts nous sont des cruels supplices. Aussi prieuez de nostre Dieu donné, nous sommes prieuez de la plus belle partie de nous-mesmes.

Nous coniurons donc vostre Maiesté de reuenir, & quoy que mortels, nous vous promettons vne obeissance immortelle. Où pourriez-vous estre avec plus d'honneur, & avec plus de seureté, que dans vne ville où l'on ne vous desire pas seulement; mais où tout le monde vous idolatre. Vostre Maiesté n'aura pas si tost mis le pied dans Paris, qu'elle entendra la Voix du Peuple, & la Voix de Dieu, entonner de tous costez, Viue le Roy, avec vne melodie incroyable. La ioyereuiendra à mesme instant dans les cœurs affligez, & tout l'Estat se remettra dans son premier lustre.

Le Roy ne scauroit abandonner tout à fait Paris, sans se priver de la plus belle partie de son Empire.

Tibere apprist bien à ses dépens, combien l'éloignement est preiudiciable à vn Souuerain. Ses Subiets commencerent à le hair plus que iamais, dès qu'il se fut refugié à la campagne; & dans cet éloignement, il y trouua sa disgrâce & sa perte. Il est vray que ce Prince ne leur auoit pas esté donné de Dieu, comme le nostre. Il s'en falloit aussi beaucoup qu'il n'eust la moindre des qualitez, que sa Maiesté possède. Mais nonobstant tout cela, plus vous differez de venir à Paris, plus vous trauallez à la ruine de vos affaires; & ie crains, que les Peuples ne s'accoustument à la fin, à prendre des libertez insupportables.

En effet, M A D A M E, la nature de l'homme n'est de soy que trop portée à mal faire. Et certès il n'est pas necessaire de souffrir dauantage, qu'il s'abandon-

ne à ses inclinations, ny qu'il se forme plus long-temps à l'éloignement de vostre personne. Vous avez plus d'insolens à contenter, que de raisonnables à satisfaire. Les partis qui commencent à se former secrètement dans toutes les Provinces de l'Estat, vous obligent à retourner dans Paris pour les détruire. C'est-là où vous trouverez la véritable subsistance des armemens, & la véritable source des Finances. Vous n'y verrez que des bourses ouuertes en vostre faueur, ny que des cœurs zelez pour vostre seruice. Vostre presence n'y serapas si tost, qu'elle dissipera tous les projets des meschans, & qu'elle augmentera toutes les esperances de ceux qui sont tres affectionnez à vostre seruice.

Sans difficulté, MADAME, ces retardemens augmentent le courage de vos ennemis, & la plus part des gens de bien se laissent corrompre par ce moyen-là aux persuasions de cette abominable engeance. En venant icy tous les troubles de France se calmeront, & tous les droits que sa Maiesté auoit accoustumé de prendre sur les Sujets, reuiendront dans les coffres du Roy, à la premiere sommation qui leur en sera faite. Les desordres ne se forment que de vostre separation, & le calme par vn contraire effect, ne scauroit arriuer que de vostre presence. Si vostre Maiesté reuient à Paris, elle n'y sera pas moins Reyne des cœurs, que Reyne de cet Empire. Ce sont des maximes d'Estat, dont les plus grands hommes des siècles passez, se sont seruis pour se rendre plus puissans, & pour venir à bout de toutes leurs entreprises.

Pouvez-vous refuser à des fideles Sujets, ce que des illustres Souuerains ont concedé aux plus grands ennemis qu'ils eussent au monde. Certainement, MADAME, vostre vertu vous fera trouuer de la veneration parmi les esprits les plus infideles. Prenez conseil

conseil de la raison, plustost que de l'iniure que vous croyez auoir receuë: & si par l'entremise de cette extraordinaire bonté, dont Dieu vous a si noblement pourueuë, vous condescendez aux supplications, que toute la France vous fait; vous retournerez dans Paris, pour y remettre les esprits diuisez, & pour y restablir vostre Empire. Ce sera alors que vostre Maieité y sera receuë, comme vn Ange de Paix, ou comme vn second Messie arriué, pour le salut de ses creatures.

Dieu en recompense de ce bien fait, vous fera present d'un nombre infiny de graces eternelles. Tout le monde vous louera, & vous n'entendrez plus raisonner dans cet Estat, que des Cantiques de ioye. Le Ciel & la terre se iointront ensemble pour vous combler de leurs benedictions, & pour ne faire qu'un melodieux concert de la Voix de Dieu, & de la Voix des Peuples.

Ce sera dans ces occasions, que vous apprendrez de quelle sorte la Voix du Peuple est la Voix de Dieu, contre le sentiment de celui, qui nous a voulu persuader le contraire. Ce sera dans ce rencontre, que l'Abondance se prosternera sous vos pieds, & qu'elle vous fera vne continuelle offrande de tout ce qu'elle aura de plus exquis, & de plus considerable. Ce sera dans ce temps si desiré, que la dignité du Souuerain se fera voir en sa plus haute splendeur, & que vostre grace eternisera sa memoire. Ce sera dès lors que vostre Maieité se rendra également chérie de ses Sujets, & que vous pourrez prendre la liberté de les faire viure dans vne certaine vnion tres-generouse, & tres-parfaite. Ce sera pour lors, que les Loix reprendront leur vigueur, & que Dieu se trouuera parfaictement reueré de ses creatures. Et ce sera encore alors que les pauures y seront soulagez, que les riches prospereront, que la ieu-


G.


ellen apprendra la vertu, & que toute la France sera
 en estime. En fin ce sera vne marque infailible, que la Paix;
 dont vostre Maieſté vient de nous honorer, subsistera,
 & que toutes choses pourront subsister avec elle. Il
 n'est ny grand ny petit; qui ne vous coniure au nom
 de Dieu, de reuenir dès qu'il vous sera possible: &
 quelque obiection qu'on vous puisse faire au con-
 traire, vous trouuerez en ce faisant, que la Voix du
 Peuple est la Voix de Dieu, & qu'il n'y a nulle diffe-
 rence entre celle de ce Souuerain Seigneur & la
 nostre.

F I N.

469

204





ct

